



Republika e Kosovës
Republika Kosovo / Republic of Kosovo
Kuvendi i Komunës Rahovec
Opština Skupština Rahovac/Municipality of Rahovec



PROCESVERBAL

Nga mbledhja e rregullt e Kuvendit Komunal të Rahovecit, e mbajtur më **30.11.2020**, me fillim në ora **10:00**. Mbledhjen e kryesoi: Kryesuesi i Kuvendit z. **Afrim Dina**. Konstatohet se kuorum, për mbajtjen e mbledhjes kemi:

Kryesuesi – Fillimisht më lejoni t'iu përshëndes, i nderuar Kryetar i Komunës z. Smajl Latifi, nënkryetar i Komunës z. **Fatmir Iska**, të nderuar kuvendarë, drejtor të drejtorive komunale, përfaqësues të mediave dhe ju gjithë të pranishëm.

Të nderuar kuvendarë, për këtë mbledhje sot propozojmë këtë:

REND DITE

1. Shqyrtimi dhe aprovimi i Procesverbalit nga mbledhja e kaluar,
2. Pyetjet dhe përgjigjet në pyetjet e kuvendarëve,
3. Shqyrtimi dhe miratimi i Propozim vendimit për vënien në debat publik të Koncept Planit për deponinë e mbeturinave të ngurta,
4. Shqyrtimi dhe aprovimi i propozim vendimit për vënien në debat publik të Koncept Planit për deponinë e mbeturinave të vëllimshme,
5. Shqyrtimi dhe aprovimi i Propozim vendimit për dhënien në shfrytëzim afatshkurtër personave juridik P – 02279-0, 02280-0, 02281-0.
6. Shqyrtimi dhe aprovimi i Propozim vendimit për ndërrim destinim të tokës bujqësore në tokë ndërtimore,
7. Shqyrtimi dhe aprovimi i Draft Rregullores për Përkujdesje dhe Mbrojtje të Fëmijëve dhe marrja e vendimit për dalje në debat publik,
8. Shqyrtimi i Propozim vendimit për shfuqizimin e vendimit 01 Nr.124/20 të datës 29.10.2020, për dhënien në shfrytëzim afatgjatë.
9. Shqyrtimi i Propozim vendimit për caktimin e lokacionit për ndërtimin e objektit për nevojat e komunitetit në Fshatin Gexhë,
10. Shqyrtimi dhe aprovimi i Propozim vendimit për dhënien në shfrytëzim afatshkurtër,
11. Informatë për zonën e mbrojtur „Kanioni i Drinit të Bardhë te Ura e Fshejtë,,
12. Shqyrtimi dhe aprovimi i Draftë Planit të Punës së Kuvendit dhe marrja e vendimit për dalje në diskutim publik.

13. Shqyrtimi dhe aprovimi i Raportit të Punës së Kryetarit të Komunës dhe marrja e vendimit për dalje në diskutim publik.

Rasim Fazliu – Faleminderit kryesues, përshëndetje për kryetarin, nënkryetarin, anëtarët e Kuvendit Komunal drejtorët, përfaqësues të mediave, të LMT-së, OSBE-së dhe të gjithë të pranishmit në sallë. Meqenëse kemi mjaftë pika të rendit të ditës por urgjenca e kërkon që me i shtuar edhe ato pika të rendit të ditës dhe ne grupi i PDK-së i pranojmë ato pika që të futen në rendin e ditës por e kam një vërejtje rreth pikave të rendit të ditës që i kemi pasur. Në mbledhjen e Komitetit për Politikë dhe Financa kam kërkuar që të hyjë në rend të ditës grupi punues që ka qenë për rikategorizimin e monumentit të natyrës, Kanioni i Drinit të Bardhë tek Ura e Fshejtë dhe kam si vërejtje se unë nuk kam kërkuar informatë, pasi ne emër të grupit e kam kërkuar këtë pikë dhe ju e keni shkruar informatë, pra në këtë çështje nuk pajtohem pasi është dashur me qenë pika e rendit të ditës ashtu siç duhet dhe më pastaj kishim procedua sipas nevojave që është.

Vahid Krasniqi – Përshëndetje kryesues, kryetar, nënkryetar, drejtor komunal, asambleist dhe gjithë të pranishmë në sallë. Meqenëse kryetarja e komisionit Besa Bytyqi sot nuk është e pranishme, desha me kërkuar që të futet në rendin e ditës edhe lista rezervë për emërtimin e rrugëve, objekteve, shesheve, për shkak se kjo liste, ne e kemi parë vendimin se kjo liste është obligative dhe përderisa është e tillë neve na bllokon komplet procesin si komision për emërtimet apo propozimet e kryetarëve të fshatrave apo të bashkësive që na kanë ardhë si kërkesë për emërtimin e rrugëve. Unë nuk po kërkoj që kjo listë të shfuqizohet por po kërkoj që kjo listë të rekomandohet dhe të bëhet liste rekomanduese dhe ne si komision do të mundohemi patjetër që të përdorim sa më shumë këto emra pasi janë afërsisht 17 emra të përdorur por gjithsej deri më tani janë përdorur afër 80% të emërtimeve të rrugëve jashtë kësaj liste dhe përderisa është kjo ne nuk mundemi me procesue me tutje apo të i sjellim në kuvend ne të ardhmen. Kërkoj prej kolegëve që kjo listë të bëhet liste rekomanduese dhe ne do të mundohemi patjetër që çdo emër këtu ta përdorim si emërtim të rrugëve shesheve objekteve apo të parqeve.

Munib Durguti – Faleminderit kryesues, unë desha të ndërlidhem me kolegun parafolës, sa i përket listës rezervë, meqenëse jam në komisionin për ankesa e kam shqyrtuar legjislacionin në fuqi që e rregullon këtë fushë. Lista rezerve mundet të plotësohet me propozime edhe aktuale, pasi nuk jem peng i listës rezervë që është lënë nga komisioni paraprak për emërtim, por të gjitha propozimet që ka marr në formë kërkesë peticione e që i plotësojnë kushtet në bazë ligjeve, ne mund të pasurojmë atë listë.

Kryesuesi – Faleminderit z. Durguti, atëherë të nderuar kolegë kuvendarë e qesim në votim rendin e ditës me pikat shtesë. Konstatohet se unanimisht aprovohet rendi i ditës. Kalojmë në pikën e parë të rendit të ditës:

1. Shqyrtimi dhe aprovimi i Procesverbalit nga mbledhja e kaluar.

Atëherë meqë nuk kemi diçka rreth procesverbalit, e qesim në votim. Konstatohet se unanimisht aprovohet pika e parë e rendit të ditës. Kalojmë në pikën e dytë të rendit të ditës:

2. Pyetjet dhe përgjigjet në pyetjet e kuvendarëve.

Ali Morina – Përshëndetje kryetar, nënkryetar, drejtor të drejtorive komunale, të nderuar asamblistë dhe gjithë të pranishmit në sallë. Unë do të ngre dy çështje, e para ka të bëjë me projektin e kubëzimit të rrugëve, pasi është mirë që komuna e Rahovecit tash ka një kontratë për kubëzimin e rrugëve, ku në njërin Lot ka filluar kubëzimi i rrugëve në fshatin Vrajakë, por unë jam shumë i shqetësuar me intensitetin e ulët të punëve që po bëhet atje dhe kërkoj nga drejtori Krasniqi që të bëjë trysni te kompania që të shtojë intensitetin e punëve për të finalizuar projektin nëpër fshatra që janë të parapara të kryhen. E dyta ka të bëjë me Majën e Shkodranit, ku vërtet ai vend po bëhet atraksion turistik jo vetëm për qytetarët e Kosovës por edhe të vendeve fqinje dhe kërkoj nga Drejtoria e Shërbimeve e Publike apo cila drejtori që ka në ombrellën e saj ndriçimin publik që të vendoset ndriçimi publik në pjesën para mureve të kalasë sepse me të vërtetë natën kalaja nuk po vërehet dhe me vendosjen e disa dritave do të shihet poshtë qytetit dhe do të duket me bukur dhe më mirë.

Munib Durguti – Faleminderit kryesues, përshëndetje për kryetarin, nënkryetarin, përfaqësues të mediave dhe të gjithë të pranishmit. Unë dëshiroj ta potencoj një problem që është krijuar me rastin e punimeve që ndodhin tash në rrugën Xhelal Hajda, pasi e dimë që aty është duke u ndërtuar një kanal për kullimin e ujërave të shiut, mbledhjen tyre dhe derdhjen në lumin Duhlllo, me ç'rast ajo rrugë është e bllokuar për komunikacion dhe kemi një komunikacion tepër të rënduar në dy rrugë tjera si në rrugën Ibrahim Rugova dhe Gëzim Hamza-Piktori. Andaj, kërkoj nga kryetari që për momentin apo në mënyrë të përkohshme që këto dy rrugë t'i vendos rrugë njëkahëshe për qarkullim, për arsye se të dyja këto rrugë nuk kanë trotuare ndërsa kemi një qarkullim të dyanshëm për mjete motorike edhe po ashtu këto dy rrugë janë tepër të ngarkuara edhe nxënësit që po shkojnë në shkollë dhe krijohet një tollovi dhe bllokim të madh në komunikacion. Kështu që e shoh shume të arsyeshme që përderisa zhvillohen punime në rrugën kryesore Xhelal Hajda, që këto dy rrugë të vendosen si rrugë njëkahëshe të qarkullimit.

Florida Bajraktari – Faleminderit kryesues, përshëndetje për të gjithë. I nderuari kryetar, në fillim të këtij mandati krijova përshtypjen e mirë për ju, pasi thash me vete se kryetari si duket do të bëhet transparent në punën e tij. Që në mbledhjet e para fillova t'i sjellësh raportet e Njesisë së Auditimit të Brendshëm por fatkeqësisht ajo praktikë nuk zgjati shumë, pasi ato auditime ishin të qeverisjes se kaluar. Pyetja është se pse e ndërpreve atë praktikë të mirë dhe e dyta është se Komiteti i Auditimit a është funksional pasi që nga formimi e deri me sot kur po flasim vetëm një herë na ka raportuar për punën që ka bërë. Pyetja ime është se kur do të raportojë para Kuvendit, pasi që jemi ndër komunat më transparente dhe mendoj se duhet që ta arsyetojmë veten.

Ali Zhuniqi – Përshëndetje kryesues, kryetar, kolegë kuvendarë. Pyetja ime ka të bëjë lidhur me çështjen e një operatori ekonomik i cili ka marrë si lloj subvencioni me ju shërbye qytetarëve e konkretisht është shërbim veterinar, edhe unë kam 3 apo 4 pyetje edhe pse drejtorit të Bujqësisë, Pylltarisë dhe Zhvillimit Rural ju kam adresua edhe pse drejtori nuk ma kthyer dhe kjo është arsyeja e pyetjes që po bëj tani, pasi unë i kam kërkuar shumën që ka përfituar operatori ekonomik edhe u dhënë si subvencion për me ju shërbye qytetarëve. Pyetja e parë është se sa ka kushtua ky subvencion që ja keni dhënë atij operatori ekonomik për me ju shërbye qytetarëve, edhe në bazë të rregullores se kuvendit shumat të cilat janë mbi 2000 euro a kalojnë përmes asamblesë për me ju dhanë atij operatori ekonomik edhe pyetja e tretë nëse kjo shumë është më shume se 2000 euro a duhet t'i kalojë të gjitha procedurat e prokurimit publik, si në komunat tjera që zakonisht ndodh edhe praktikat e tilla qoftë për vaksinim apo qofte të sëmundjeve të krerëve, kafshëve zakonisht qiten në tenderim dhe pas procedurave të prokurimit publik ato shkojnë. Edhe a ka të drejtë komuna me subvencionua një operator privat ekonomik, pa marrë parasysh llojin e shërbimit që ka, në mënyrë që i njëjti operator me ju shërbye qytetarëve ndërsa në praktikë ne e dimë që zakonisht që subvencionimi shkon direkt nga ana e kryetarit apo stafit komplet të drejtorive të caktuara dhe në ndërkohe ju e keni subvencionuar një operator ekonomik për me ju shërbye qytetarëve dhe nëse ka mundësi drejtori me na tregua rreth këtyre pyetjeve që i parashtrova deri më tani.

Rasim Fazliu – Faleminderit kryesues, unë do të bëj një pyetje për drejtorin. Kemi mbushjen e rrugëve fushore në fshatin Celinë, ku e shoh që ai operator ekonomik ka që një muaj që ka fillua, ku ka kryer disa pjesë edhe nuk e ka bërë mbushjen e mirë të rrugës, kështu që dua të di se a keni kontaktuar me atë dhe kur do ta përfundoj atë rrugë, pasi jemi në prag të stinës së dimrit edhe mbetet keq pastaj rruga për kalim. Po ashtu rreth rrugës lidhet si pyetje e dytë, që është mirë duke u rregulluar shtrati i lumit në mes të Krushës së Madhe dhe Celinës ku ajo pjesë që është rregulluar është bërë mirë dhe do të vazhdoj me siguri por një shqetësim të banorëve të asaj zone ku banojnë është që tash jemi në prag të stinës së dimrit ku ka shira e borë dhe është e pamundur me kalua aty njerëzit pasi fillojnë tash shirat dhe do të ishte mirë se paku e intervenua me disa

kamionë zhavorr që me ju bë të mundshme me kalue ata edhe pastaj kur të vinë ato procedurat tjera i kryeni sipas rendit dhe planifikimit që i keni.

Mirjeta Krasniqi - Përshëndetje për juve, kryetar, nënkryetar, drejtor, kolegë këshilltar dhe media. Pyetja ime ka të bëjë me drejtorinë e Arsimit gjegjësisht me gjithë qeverinë komunale, ku dua të di me kërkesën që kanë bërë një pjesë e arsimtareve se si qëndron në lidhje me pagesën e shujtës ditore, pra si qëndron komuna e Rahovecit për këtë dhe deri ku ka ecur vendimi deri me tani, pasi që kjo është e paraparë me kontratën kolektive në vitin 2017.

Fehmi Hoxha – Përshëndetje kryesues, kryetar, nënkryetar, kuvendarë, drejtorë të ekzekutivit, media dhe gjithë pranishëm. Unë dua të përsëris përsëri pyetjen time duke u bazuar në zotimet e kryetarit para miratimit të projeksonit buxhetor për rregullimin e kanalizimit fekal dhe ujërave atmosferike në rrugën Fahredin Hoxha. Kryetari është zotuar se do të përfundoj këtë punë para vitit të ri në këtë vit. Pyetja ime është pasi kemi edhe një muaj dhe koha po keqësohet, a do të filloj dhe do të përfundoj këtë vit apo kalojmë në vitin tjetër.

Shqipe Kryeziu – Faleminderit kryesues, përshëndetje për të gjithë. Pyetja ime ka të bëjë me drejtorinë komunale të arsimit, ku para disa muajve drejtori e ka shpallur një konkurs të fshehtë me arsye se ka pasur probleme teknike, ku është punësuar një mësimdhënëse prej komunës së Prizrenit me Bachelor për lëndët juridike në shkollën Selajdin Mullaabazi-Mici. Por, mësimdhënësjë në fjalë ka qenë zëvendësim i orëve për pushim të lehonisë që ka shkuar. Mësimdhënësjë është rikthyer në muajin qershor por ajo që është punësuar ende është në listën e pagave, pra ende paguhet edhe pse qëndron në shtëpi. Pyetja ime ka të bëjë se a është e drejtë një mësimdhënëse që vjen paguhet me 200 euro dhe i mban me këto që keni marr për pandemi kurse ajo duke qëndruar në shtëpi me marr rrogë të plotë. Unë vet rastësisht e kam parë në listën e pagave dhe nuk është thashethem.

Fahrie Lushi – Faleminderit kryesues, i nderuari kryetar, nënkryetar, kolege këshilltarë dhe media. Unë kam një pyetje që lidhet me ujin e pijes dhe desha ta pyes kryetarin, se sa shpesh shikohet cilësia e ujit të pijes sepse kohëve të fundit në komunën tonë uji ka një erë dhe ne e dimë se uji është i vetmi gaz që nuk ka as ngjyrë dhe as erë, kështu që ju sugjeroj që të merreni pak me cilësinë e ujit sepse ka ankesa nga shumë banorë.

Kryetari – Përshëndetje për kryesuesin, për anëtarët e kuvendit të komunës, drejtorët e drejtorive, nënkryetarin, mediat, përfaqësuesit që përcjellin këtë seancë si OSBE-së, LMT-së, faleminderit për praninë tuaj këtu. Unë do të përgjigjem vetëm disa pyetjeve që kanë të bëjnë me qeverinë komunale ndërsa do të kursehem në përgjigjet që do të japin drejtorët si drejtori i arsimit apo edhe ndonjë drejtor tjetër. Ndërtimi i rrugëve lokale, sigurisht që drejtori Përparimi mund të jep edhe detaje të tjera, ne kemi një plan të performancës që e kemi fituar për këtë vit 255,729 euro, ku prej tyre 155,000 janë për rrugë lokale ndërsa 100,000 janë për shtretër të përrrenjve ose lumenjve. Ekziston rreziku që edhe ky 155,000 që për shkak të shkurtimeve buxhetore që edhe me herët isha në komunikim që ato komuna që nuk kanë nënshkrua kontrata edhe kanë fitua grantin e performances, ekziston mundësia me ja marr mirëpo nuk jemi pa rrezik edhe ne. Pra janë 3 operator (lote), ku një lotë ka filluar punën në Vrajakë, një lote ka filluar punën në Krushë të Madhe dhe një lotë ka filluar punën në qytet. Ku të gjithë i kanë nga 50,000 euro dhe vetëm njëri i ka 55,000. Të gjitha punët në fakt që e mbulojnë këtë shumë janë kryer, edhe ky që ka filluar në Vrajakë që ka ndërtuar një rrugë mbi 600 metra dhe ka nisë rrugën tjetër, po ashtu edhe ky që është duke punuar në Krushë dhe po ashtu ky tjetri që është duke punuar në Rahovec, pra nuk kanë mjete tjera për këtë vit, por sidoqoftë unë pajtohem me Alinë se duhet me u rritë dinamika me mirëkuptim dhe mirëbesim që me rrite aktivitetin dhe intensitetin e punëve që me krye ma shume rrugë. Por këto dy rrugë në Vrajakë janë shumë të gjata, ku njëra është 700 metra kurse tjetra mbi 500 metra, edhe kanë qenë rrugë jo të hapura edhe ka pasur probleme pak me prona dhe shpresoj se do të vazhdoj aktiviteti. Te ndriçimi publik para mureve të Kalasë të Maja e Shkodranit jam dakord dhe është diskutuar ndonjëherë dhe ka pasur ndonjë ide por do të ishte mirë me pas edhe ndriçim publik edhe

kalaja prej guri që me u pa më mirë, pasi ato drita që janë aty janë rregulluar dhe janë riparuar edhe janë vendos edhe të reja, po ashtu siç e dini ka pasur edhe dëme në Majën e Shkodranit dhe tash ai objekt ose ai monument është nën përkujdesje të kamerave të sigurisë që në disa pozicione monitorohet edhe nuk besoj që do të ketë telashe, kështu që mirëmbajtja edhe siguria është me e lartë, edhe mund të ketë ndriçim në muret e kalasë por sivjet nuk besoj që mundemi me mbërri aty. Te pyetja e parashtruar nga Munib Durguti, ka kërkuar me bo zgjidhje për shkak të ngarkesës së madhe që ka rruga Ibrahim Rugova dhe Gëzim Hamza, sigurisht për shkak të punimeve në kanalin e ujërave atmosferik. Është e vërtetë se punimet në kanalin e ujërave atmosferik vazhdojnë dhe ka pasur disa sfida operatori që besoj i keni parë edhe ju pasi po ka shembje e sidomos në pjesën ka është duke operuar tani dhe unë mendoj se është duke u bërë një zgjidhje e mirë aty, e më pastaj zgjidhja duhet të vazhdohet te lumi Duhlllo e teposhtë. Por, a kam të drejtë me vendos tash rrugë njëkakshe dhe unë mendoj se mirë që e keni ngritë këtë çështje dhe do të shohim me policinë e me pjesën e trafikut e ekspertizën e tyre që e kanë dhe nëse ma jep mundësinë Kuvendi i Komunës do të operoj kuptohet edhe në përputhje me mirëkuptimin dhe porosinë që mundemi me marr prej kësaj seance. Edhe nëse bëhet rrugë njëkahëshe, nuk jam i sigurt se ka duhet me u bo dhe nuk e di këtë, e sigurisht duhet me u konsultua edhe me shërbimet publike edhe me urbanizmin e po ashtu edhe me policinë. Kështu që nëse ma jepni mandatin me vendos, unë punoj në këtë drejtim edhe menjëherë pas kësaj seance mundem me i thirr këto ekipe edhe me punua gradualisht edhe me ardh deri një vendimmarrje e drejtë. Tek pyetja e parashtruar nga Florida Bajraktari, ndoshta edhe mundeni me u zhgënjye te unë apo me krijua ndonjë situatë zhgënjyese, por Njësia e Auditimit të Brendshëm, ju e dini se e ka një plan që i auditon të gjitha drejtoritë në planin vjetor të auditimit, edhe unë vet edhe në mandatin e parë edhe në mandatin e dytë sipas logjikes time i kam kërkuar me i qitë në Kuvend, edhe nganjëherë se nuk ka pika të rendit të ditës në fillim të mandatit por i kemi qitë dhe ndërkohe ka ardh një rekomandim që mos me i qitë sepse është në shpërputhje me obligimet ligjore që bartim të gjithë ne, edhe ju si kuvend edhe ne si ekzekutiv, ngasë auditori i brendshëm është këshilltar i kryetarit të komunës dhe auditori i brendshëm nuk i raporton kuvendit të komunës por e këshillon kryetarin e komunës dhe e ndihmon dhe raportet e auditimit të brendshëm në kuptimin e llogaridhënies janë në duart e auditorëve të jashtëm pra të Zyrës Kombëtare të Auditimit dhe nëse ka vërejtje konkluzione të gjetura dhe rekomandime i jep auditori i jashtëm për auditorin e brendshëm. Pra, është aspekti ligjor ai që ka ndihmuar se përndryshe absolutisht unë në këtë pikëpamje jam shumë transparent edhe jam për me i paraqitë raportet e auditimit por në kuptimin ligjor por edhe në kuptimin logjik pas interpretimve dhe shpjegimeve që i kanë bërë është e ndaluar me i qitë në kuvendin e komunës, kështu që në këtë kuptim nëse ka mbetur matja e transparencës të bëhet edhe në këtë pikë, unë vet e kam bërë këtë punë dikur edhe në fillim të mandatit por edhe në mandatin e parë, tash jam detyruar me ndërpre edhe përkundër që mua nuk me kishte penguar kurrë me i qitë raportet e auditimit asnjëherë, sepse unë i mendoj se raportet e auditimit neve na ndihmojnë. Pastaj pyetjen e parashtruar nga Ali Zhuniqi, unë po përpiqem me dhanë një përgjigje parimore që lidhet me subvencionet, kur dihet se në subvencione nuk ka tender por ka një rregullore për shpërndarjen apo ndarjen e subvencioneve, ju e dini e sidomos ata që kanë përvojë në administratë dhe nëse e lexojmë ligjin dhe rregulloren e Ministrisë së Financave por edhe rregulloren që e ka aprovuar ky kuvend në mandatin e z. Vehapi, unë deri 1000 euro si kryetar komune kam të drejtë me ja dhanë një subjekti fizik, deri 2000 euro kam të drejtë OJQ-ve ndërsa përtej shumes 2000 euro duhet me pyet Kuvendin e Komunës. Tash rregullorja për ndarjen e subvencioneve thotë, lëshohet thirrja për aplikime në pozicione të caktuara për produkte të caktuara etj. dhe në kuadër të kësaj ne kemi zbatuar një rregullore që ka të bëjë, pasi është një zotim publik i kryetarit të komunës që shërbimet veterinarë me u krye falas dhe më vjen mirë që kemi mbërri tash, pasi e kemi lëshuar thirrjen dhe ka konkurruar vetëm një operator dhe thirrja ka qenë publike dhe kanë pasur të drejtë për subvencione me aplikuar dhjetë operatorë tjerë të kësaj komune pasi duhet në subvencione me aplikua vetëm të komunës pasi nuk është

tender por vetëm thirrje publike. Kështu që ka aplikua një operator i cili ka plotësuar kriteret dhe nuk e di a janë ekzekutuar mjetet por e di që ka qenë shumë e paraparë për shërbime veterinarë në komunën e Rahovecit nga ekipet veterinarë të kësaj komune që mu krye ky projekt. Tash nuk ka nevojë me pyet kuvendin e komunës në këtë rast, sepse thirrjet për aplikime në subvencione lëshohen në bazë të rregullores dhe në bazë të ligjit, kështu kemi vepruar edhe me bursa edhe me të gjitha kategoritë e subvencioneve të komunës së Rahovecit, kështu kemi veprua edhe në sport, rini e kulturë. Pra, çështja është se nuk ka asnjë lloj shkelje as minimale, që mund të mos ketë zbatim të plotë të kontratës sepse operatorët nganjëherë dinë mos me qenë të përpiktë por ajo është detyrë e komunës e komisioneve për me monitoruar zbatimin e kontratës e në këtë rast e shërbimeve veterinarë. Ne e kemi për detyrë me dërgua një raport për hargjimin e subvencioneve kuptohet në vitin e ardhshëm kur bëhet raportimi. Kjo është e vërteta e vetme parimore pa u lëshua ne detaje që ndoshta mund të ju jep edhe drejtoria se çfarë lloj shërbimesh veterinarë kanë me u kryer edhe çfarë shume e subvencioneve që nuk e di tash. Por, të gjitha detajet edhe kriteret e thirrjes edhe qëllimin e këtij shërbimi e shpjegon edhe në thirrje por edhe në bazë të kontratës që lidhet edhe pastaj monitorimi i zbatimit të asaj kontrate dhe raportin në fund që i bie Kuvendit të Komunës. Pra, ndoshta është ndonjë keqkuptim në kuptimin e asaj që unë nuk jap subvencione me shume se 2000 për OJQ dhe më shumë se 1000 euro me nënshkrim të kryetarit të komunës por kam të drejtë edhe 50,000 euro me i dhanë në thirrje për aplikim pa e pyetur Kuvendin e Komunës sepse Kuvendi i Komunës ka vendosur me miratimin e buxhetit sa ka subvencione ne kulturë rini sport pastaj sa ka zyra e kryetarit, shëndetësia, arsimit, bujqësia etj. dhe i mbetet ekzekutivit që në bazë të ligjeve dhe rregulloreve në fuqi përmes thirrjeve me i lëshua ato subvencione ose në shuma të vogla edhe kryetari pa pasur nevojë për thirrje lëshon p.sh. ndihma momentale 300, 400, 500, 1000 euro subvencionon dhe për OJQ deri në 2000 euro pa e pyetur askënd pasi është e përcaktuar me rregullore dhe ata që janë jurist munden me demantua por për çdo veprim e konsultoj Zyrën Ligjore po ashtu edhe rregulloret dhe ligjet që janë faktikisht në fuqi. Drejtori i Bujqësisë Berat Duraku ka mundësi me plotësua këtë çështje por unë vetëm përgjigjen parimore e dhashë që nuk ka ndonjë shkelje as edhe minimale. Shkelje mundet me pas ne zbatim të kontratës por detyra jonë është me monitorua zbatimin e plotë të kontratës.

Ali Zhuniqi – Në cilën rregullore që the më herët që ne e kemi votua këtu d.m.th. ju keni qitë kriter që një operator ekonomik konkretisht biznes me pas përvojë pune dhe unë nuk e di nëse ekziston rregullore që thirrja është bërë mbi përvojën e punës se operatorit ekonomik dhe mendoj se kjo është shkelje dhe zyrtaret ligjor i kemi këtu edhe munden me na dhanë përgjigje në lidhje me këtë.

Isak Hoti – Është rregullorja për kushtet kriteret dhe procedurat e ndarjes se subvencioneve, edhe në këtë rregullore i kemi paraparë dy kategori persona fizik dhe juridik dhe mbi bazën e kërkesës dhe mbi bazën e thirrjes publike që janë dy kategori. Nëse shkoni radhe, te rregullat e përgjithshme e keni nenin 4, pastaj vlerësimi i kërkesave e keni te neni 8, kriteret janë të përcaktuara për secilën drejtori veç e veç, pastaj neni 19 ku nuk mundesh me ja dhanë një operator ekonomik qoftë edhe një organizatë jo qeveritare nëse nuk e ka përvojën e punës në atë lëmi d.m.th. është përvojë që ai e dëshmon me dëshmitë e veta që ka krye atë veprimtari qoftë në komunën tonë apo dikun tjetër, pasi është obligative dhe e domosdoshme. Pra te neni 19 e keni të përcaktuar e gjithë procedura se si zhvillohet tek drejtoria për Bujqësi, po ashtu ceket edhe numri i rregullores 1427 të datës 28.04.2017, dhe sa e mbaj mend e kemi bo me Demos-in zviceran në bashkëpunim me ata dhe kemi pasur goxha shume polemika pasi kryetari atëherë kërkonte me çdo kusht që në kuvend të votohen çka janë mbi 2000 euro për gjithçka. Megjithatë te thirrja publike, Demos nuk ka lejuar në atë kohë edhe e kemi miratuar ashtu, kështu që mbi bazën e thirrjes publike ka mundësi nëse i ke këto subvencione mbi bazën e buxhetit të vitit paraprak i ke paraparë 500,000 euro siç tha kryetari me herët, keni të drejtë me i dhanë pa e sjellë edhe njëherë në kuvend mirëpo duhet plotësuar kushtet kriteret të përcaktuara mbi bazën e kësaj

rregullore. Kështu që mbi bazën e këtyre kriterëve në rregullore asnjë ligj por edhe asnjë udhëzim administrativ ti nuk mundesh me pae gjithçka.

Kryetari – Tek shtrati i përroit që ndan Krushën e Madhe dhe Celinën, është e vërtetë që duhet me rrafshua rrugët aty dhe kontrata parasheh edhe ndërtimin e rrugëve në të dy anët e po ashtu edhe ndriçim publik e plotë elemente tjera por meqenëse jemi në prag të dimrit është mirë të intervenohet sa më shpejtë që është e mundur. Pastaj te rrugët fushore, unë i kam vërejtjet e mia e po ashtu edhe drejtori i ka vërejtjet e tija për mënyrën se si ka punuar, nuk jemi të kënaqur me punën që bënë por ne do të insistojmë që ta zbatojë sa me shpejtë kontratën, pasi kemi kapak vështirësi me atë operatorin, që realisht nuk e kemi me operatorin tjetër që të njëjtën punë e bën por e di që ka pak ngecje në Celinë. Pastaj pyetja e parashtruar nga Mirjeta Krasniqi rreth shujtave, edhe me herët e patëm këtë diskutim me Zyrën Kombëtare të Auditimit edhe me një pjesë të asamblastëve të komunës tonë. Ne kemi problem me shujta edhe po rritet numri i padive për me i fitua shujtat sipas kontratës kolektive. Ne e kemi ngritur zërin edhe ne emër të komunës së Rahovecit e po ashtu edhe në Asociacionin e Komunave e kemi bërë problem këtë çështje pasi nuk është çështje e vogël dhe ne e dimë se ju takojnë shujtat edhe pagat jubilarë mësimdhënësve sipas kontratës kolektive por gjithashtu e dimë se ne nuk jemi nënshkruar të kontratës kolektive dhe ashtu si Qeveria e Kosovës përmes Ministrisë së Arsimit dhe Financave ka vendos me ju lejua komunave me planifikua mjete për paga jubilarë duhet ta bëjë të njëjtën gjë sipas nenin 46 edhe për shujta. Nëse nuk e bëjnë ata atëherë ne jemi të kërcënuar realisht në pikëpamje buxhetore për shkak se ata kanë me i realizua të drejtat e tyre që pa të drejtë me i vendos barrë komunës ndërsa niveli qendror nënshkruan kontrata pa u konsultua me nivelin lokal edhe atëherë kur nënshkruan kontrata edhe merr obligime ligjore me i sigurua mjetet edhe nuk e bën këtë punë, kështu që jemi në diskutim sipër se si do të gjendet zgjidhja për shujtat që ju takojnë mësimdhënësve. Kështu që nëse ata i merrnin komunës tonë atëherë afërsisht mbi 2 milion do të i kushtojnë shujtat e mësimdhënësve, pasi ata kanë shkuar qoftë përmes sindikatës apo përmes avokatëve dhe ka filluar me u rritë numri i padive në gjykatë. Shpresojmë që të gjendet një zgjidhje dhe ne do të vazhdojmë punën tonë që kjo çështje e adresuar për nivelin qendror të merret shumë seriozisht edhe të ju ndihmohet komunave që të ju hiqet barra që në njëfarë mënyrë nuk ju takon sepse edhe ashtu nuk po të japim mundësi planifikimi dhe nuk po sigurojnë fond me i pague edhe njëkohësisht po e fitojnë të drejtën tash mësimdhënësit për me realizua kontratën kolektive e nënshkruar në vitin 2017. Te pyetja e parashtruar nga z. Fehmi Hoxha rreth kanalizimit fekal, unë e di që drejtori Përparim Krasniqi ka qenë te ju dhe ka biseduar me juve dhe poashtu e dimë që nuk është problem i vogël, pra është problem me i madhe nga ajo që me ka informua drejtori Përparimi dhe e di që për me ndodhë ajo punë duhet një buxhet shumë më i madh se sa që është menduar në fillim. E di që kjo punë duhet me u krye dhe unë zotimin e mbaj dhe nuk jam i sigurt se a do të mundet me u krye sivjet për arsye objektive dhe asnjë arsye tjetër mirëpo ai projekt kushton shumë më tepër se sa që është menduar dhe ne nuk e kemi pasur në pozicionin e kontratës pasi duhet me u krye edhe dy apo tri veprime shtesë për me ardh deri te një kanalizim që realisht është shqetësim legjitim i juaji dhe me të drejtë e ke ngritur disa herë dhe ndoshta drejtori Përparim Krasniqi ka mundësi me ju informua më shumë rreth kësaj punë. Pastaj pyetja e parashtruar nga Fahrie Lushi rreth ujit të pijes. Për cilësinë e ujit të pijes është e vërtetë që bëhen analizat e ujit dhe nxjerren rezultate të analizave nga një ekspertizë e caktuar që e ka në këtë rast KRU Gjakova për ato vende ku mbulohen me ujin e pijshëm nga ujëmbledhësi i Radoniqit. Arsyetja që uji kundërmon ndonjëherë, me sa kam njohuri unë që algat dhe myshqet që krijohen në liqen krijojnë një materie që kundërmon dhe pastaj ujit i vjen era dhe nuk e ka shijen e ujit të nevojshëm për pije. Por edhe për atë problem ka zgjidhje me sa e di unë sepse ata që kujdesen për ujin e pijshëm në KRU Gjakova kanë ekspertizën apo kanë marr materie apo substanca që i eliminojnë ato që krijohen dhe krijojnë erë por mos të harrojmë që ka gypa të asbestit që janë shumë të vjetër dhe plotë probleme tjera teknike prej fabrikës së filtrave nëpër gypa që janë shume të vjetër dhe nuk është bërë ndërrimi i tyre dhe plot probleme tjera por unë

mendoj që është mirë si çështje që e ngrite dhe ta kemi më të qartë se këto ankesa duhet me i adresua edhe njëherë gjate bisedës apo komunikimit që kemi KRU Gjakova. Unë nuk kisha dashur me u lëshua më shumë përveç Shqipe Kryeziut që me ju përgjigj drejtori Avni Morina për çështjen e konkursit.

Avni Morina – Përshëndetje për te gjithë të pranishmit. Çështja e futjes në listën e pagave të mësimdhënësve është një çështje që përballemi çdo muaj ku kemi punëtor të rinjë, pasi ne i përcjellim ndryshimet çdo fillim muaji para datës 10 dhe jo çdo herë na shkon mirë në vendosjen e punëtorëve në listën e pagave dhe kjo ndodhë për arsye se ne kemi numrin e kufizuar se sa punëtor i kemi në drejtorinë e arsimit dhe nëse e kemi një me tepër atëherë Ministria e Financave na thotë që të presim deri sa të lëshohet një vend tjetër. Dhe njëjta gjë ka ndodhur edhe me rastin që e përmendi Shqipe Kryeziu dhe unë këtë ja kam sqaruar Shqipes mirëpo kjo ka deshtë me bo edhe publike këtë çështje. Por, është një çështje që përballemi çdo herë kur nuk mund t'i fusim në listën e pagave atëherë detyrohemi të presim për një muaj, dy muaj dhe deri ne 4 muaj pastaj kur i kemi futur ne listën e pagave ju kemi vazhdua kontratën për aq kohë sa kanë punuar punëtorët. Dhe krejt është normale që punëtorja që ishte deri me tash, ajo është në listën e pagave sepse mbi 3 muaj nuk i kemi dhënë pagë sepse nuk kemi mundur me futë në listën e pagave dhe ajo do të jetë në listën e pagave deri sa të ja paguajmë borxhin pastaj largohet nga lista.

Kryesuesi – Faleminderit shumë drejtor për sqarimin, të nderuar kolegë kuvendarë kalojmë në pikën e tretë të rendit të ditës:

3. Shqyrtimi dhe aprovimi i Propozim vendimit për vënien në debat publik të Koncept planit për Deponinë e mbeturinave të ngurta.

Përparim Krasniqi – Faleminderit kryesues, te nderuar anëtarë të kuvendit, monitorues dhe gjithë të pranishmit në sallë. Drejtoria e Shërbimeve Publike ka hedhur në debat publik të dy plan rregulloret, plan lokal për menaxhimin e mbeturinave të ngurta dhe planin e menaxhimit të deponive për mbeturina të vëllimshme mirëpo pasi si pike e tretë e rendit të ditës, vetëm për planin e mbeturinave të ngurta. Shkurtimisht ky plan lokal për menaxhimin e mbeturinave inerte është një dokument planifikimi që mundëson zbatimin e strategjisë kombëtare d.m.th. që si synim kryesor ka përmbushjen e zbatimit të politikave kombëtare të menaxhimit të mbeturinave. Ky koncept dokument, shkurtimisht do të ju jap pasi edhe e keni materialin mjaft voluminoz që përfshin mbledhjen e të dhënave, vlerësimin aktual, opsionet e menaxhimit, shërbimit cilësor dhe nevojat financiare dhe investimet. Përmes këtij plani komuna e Rahovecit rritë standardet e përmirësuarra për mjedise të pastër dhe zvogëlon sasinë e mbeturinave, që po ashtu ky plan ofron edhe një zgjidhje që përmirëson standardet e shërbimit dhe minimizojnë ndikimet negative dhe ekonomike me qytetaret. Fushëveprim kryesor i këtij plani ka synim që të përmirësoje menaxhimin e mbeturinave inerte në mënyrë efektive dhe të qëndrueshme. Përmes këtij plani i inkurajojmë ndarjen e tyre në burim si pika referuese deri te riciklimi edhe ndarja në nivel të përpunimit. Ky plan si synim ka fokus që qytetaret dhe bizneset që operojnë në fusha të ndryshme të bëjnë ndarjen efektive për grumbullimin e mbeturinave inerte. Sa i përket deponive ilegale, ne tash kemi edhe disa zona tjera përveç Rahovecit që i kemi caktua për grumbullimin e mbeturinave inerte, që po ashtu me vendim të kuvendit janë caktua edhe disa zona tjera në vendbanime tjera kështu që ky plan është harmonizuar dhe besoj që do të ju shërbej gjithë qytetareve. Shkurtimisht kjo është në pika referuese dhe nëse keni diçka ne do të jemi këtu për sqarime shtesë për këtë deponi.

Rasim Fazliu – Faleminderit kryesues, e falënderoj drejtorin për prezantimin e kësaj pike të koncept planit për deponinë e mbeturinave të ngurta. Unë do të kërkoj disa sqarime nga drejtori edhe për deponinë e mbeturinave të ngurta edhe për deponinë e mbeturinave të vëllimshme. Por, paraprakisht kërkoj nga drejtori që na tregojë se deponinë që na e kemi caktuar lokacionin për këto deponi atje lart, pasi dua të di se a është i njëjti lokacion për këto dy plan koncepte edhe të mbeturinave të ngurta edhe të vëllimshme d.m.th. me një vend pra me një parcelë, pastaj e dyta që më intereson pak me tepër deri ku komuna e Rahovecit ka mbërri me bo përgatitjen e infrastrukturës në këtë lokacion të deponisë. Po ashtu desha me shkue edhe ajo që më intereson pak më shumë

tek tabelat 3,4,5 që janë faza e pare, e dytë, e tretë, e katërt pasi po dua me i pas më shumë të qarta për vete që mandej me dal edhe në debat publik, që me na sqarua në pika të shkurta, pasi siç e pashë unë psh tabela 3, zërat e kostos për ndërtimin e lokacionit të deponisë e kap një shumë prej 40,000 euro, pastaj e kemi tabelën 4, vlerësimi i kostove i pajisjeve për deponinë inerte 293,000 euro, pastaj tabela 5 vlerësimi i kostove për operimin mirëmbajtjen 43,016 euro. Pyetja ime është kjo, se cilat janë përgjegjësitë e komunës dhe sa ka me dhanë buxhet komuna që me investua ne ato deponi të mbeturinave edhe cilat janë përgjegjësitë që i merr operatori ekonomik qoftë privat apo diçka tjetër që mundet me marr atë për menaxhimin e deponisë së mbeturinave, pra dëshirojmë me ditë se sa duhet me investua komuna rreth këtyre tabelave që te jemi të qarte rreth kësaj çështje.

Përparim Krasniqi – Është e vërtet se është pjesë e deponisë që është e caktuar me vendim të kuvendit në Rahovec mirëpo ne nuk do të ndalemi vetëm me këtë deponi pasi do të shpërndahemi edhe ne deponi tjera që janë të caktuara nga ky kuvend që janë të shpërndara edhe ne vendbanime tjera. Pjesë e këtij lokacioni do të ndahet edhe një pjesë e këtij që do të krijohet një data bazë dhe do të krijohet një vend i posaçëm për hedhjen e mbeturinave të vëllimshme dhe te ngurta d.m.th. do të bëhet një klasifikim brenda kësaj zonës. Mirëpo ne pikën e tretë që e kemi kur te marrim vendimin me kriteret që do të hedhim ne ankand publik, për shkak se ka dështua ankandi publik për shkak të këtyre mjeteve atëherë do të caktohen edhe kriteret se si do te menaxhohet deponia legale. Pra kjo është arsyeja që ne pikën e tretë do të sqarojmë te gjitha këto që i përmenda pak me herët tek investimet, sigurisht se komuna e Rahovecit duhet me planifikua investime me afatgjate pasi komuna jone ka fillua edhe ne grandin e dytë është shpallur për mjedis të pastër d.m.th. ka fitua grandin e dytë dhe ne duhet me u kujdes që këto deponi të jenë të pastra. Po ashtu për sqarim, ekspertet e Giz-it ne bashkë punim me një OJQ- që janë partner lokal të Giz-it që janë duke bërë hartimin e planit kanë planifikua këto mjete mirëpo komuna e Rahovecit ne bazë të mundësive buxhetore që i ka ndanë mjete për këto ndarje ne burim të deponive.

Kryesuesi – Faleminderit shume drejtor për sqarimet, e qesim ne votim pikën e tretë të rendit të ditës. Konstatoj se unanimisht kalon edhe pika e tretë e rendit të ditës. Kalojmë në pikën e katërt të rendit të ditës:

4. Shqyrtimi dhe aprovimi i Propozim vendimit për vënien në Debat Publik të Koncept Planit për Deponinë e mbeturinave të vëllimshme.

Kryesuesi – Të nderuar kolegë kuvendarë, e qesim në votim pikën e katërt të rendit të ditës. Konstatoj se unanimisht aprovohet pika e katërt e rendit të ditës. Kalojmë në pikën e pestë të rendit të ditës:

5. Shqyrtimi dhe aprovimi i Propozim vendimit për dhënien në shfrytëzim afatshkurtër personave juridik P – 02279-0, 02280 -0, 02281-0.

Përparim Krasniqi – Përshëndetje për te gjithë. E keni edhe materialin përpara që keni një arsyetim që është bart tek deponia legale për shkak se ne ankandin publik nuk ka pasur të interesuar për marrjen në menaxhim të deponisë legale ne Rahovec për shkak të kriterëve që i përcakton rregullorja për taksa tarifa dhe gjoba, që është vlere minimale prej 2000 euro që duhet të përcakton komuna e Rahovecit në momentin kur operatori ekonomik e merr ne shfrytëzim. Ne për shkak të ankandit i kemi hequr të gjitha procedurat ligjore dhe e kemi vënë në ankand mirëpo nuk ka pasur të interesuar dhe tash është ideja me shfuqizua vendimin paraprak dhe me marrë një vendim që nëse jepet në shfrytëzim me ankand publik të jepet pa pagesë, që ne të mos bëjmë asnjë lloje diskriminimi jo vetëm për Rahovec por edhe ne zonat tjera që janë shpallur me vendim të kuvendit deponit legale që të jepen pa pagesë të gjithë operatoreve që janë të interesuar me marr.

Rasim Fazliu – Unë fillimisht po kërkoj me ditë që komisioni që ka qenë i formuar rreth kësaj çështje, se cilat kanë qenë kushtet e kërkuara nga komisioni dhe sa ka qenë e caktuar pagesa për këtë deponi, pra, cilat kanë qenë kushtet e ankandit publik dhe me pa se sa kanë qenë të përballueshme. Pastaj unë kam një vërejtje, meqenëse jemi te komisionet do të flas pak në përgjithësi, pasi kam një vërejtje se te gjitha komisionet kanë dalë prej kuvendit edhe vërejtja ime shkon te komisionet, pasi asnjë komision nuk raporton para kuvendit kur

të kryen një punë të caktuar, pasi është obligative që komisioni apo kryesuesi i komisionit edhe me na njoftua për punën që kanë kryer dhe kemi marr këto vendime. Kështu që, ne si kuvend nuk dimë asgjë rreth punës se tyre pasi të gjitha komisionet kanë dal prej këtij kuvendi me përjashtim të komisionit për zgjedhjen e këshillit të fshatrave dhe te lagjeve ne qytet që kanë raportua këtu në kuvend kurse komisionet tjera nuk raportojnë në kuvend. Kështu që kërkoj tash e tutje çdo komision me raportue këtu në kuvend.

Përparim Krasniqi – I nderuari baca Rasim, në ankandin e shpallur kanë kushtet minimale, në vija të trasha që ka qenë e planifikuar të bëhet rrethoja një sigurim peshorja, për shkak se vendimin që ka marr kuvendi për deponimin e mbeturinave inerte, ku është caktuar për 0,40 cent për metër kub dhe po ashtu ka qenë ndarja në burim. Pra këto kanë qenë kriteret minimale që i kemi përcaktuar mirëpo rregullorja për taksa tarifa dhe gjoba, e përcakton që 2000 euro operatori ekonomik që merr atë duhet të i paguaj komunës se Rahovecit d.m.th. tash operatorët ekonomik nuk kanë pasur mundësi apo kanë menduar që nuk mundën me i mbledhë taksat atëherë pse me i pagua komunës se Rahovecit edhe kjo është arsyeja e tërheqjes prej ankandit, kështu që nuk ka pasur të interesuar. Pra ideja është me hedhë në ankand publik pa pagesë, për shkak se me ju ofrua mundësi operatoreve ekonomik jo vetëm ne Rahovec por edhe ne zona tjera që i kemi caktuar me vendim që të bëhet menaxhimi me i mirë i deponive inerte.

Kryesuesi - Faleminderit shume drejtor për sqarimin, tani e qesim ne votim pikën e pestë të rendit të ditës. Konstatohet se unanimisht aprovohet pika e pestë e rendit të ditës. Kalojmë në pikën e gjashtë të rendit të ditës:

6. Shqyrtimi dhe aprovimi i Propozim vendimit për ndërrim destinim të tokës bujqësore në tokë ndërtimore.

Fatmir Iska - I nderuar kryesues, kryetar, të nderuar anëtarë të Kuvendit Komunal. Në mungesë të drejtorit të Bujqësisë po e prezantoj unë shkurtimisht. Ju para vetes e keni vendimin, ku kërkohet ndërrimi i destinimit prej tokës bujqësore ne tokë ndërtimore, ku pala fillimisht ka parashtruar kërkesë në drejtorinë e bujqësisë për ndërrim të destinimit pastaj ka parashtruar kërkesë edhe në drejtorinë e urbanizmit, ku është pajisur me leje për kushtet ndërtimore në fakt dhe tash kërkohet leja e Kuvendit Komunal që me pas mundësi ai me u pajis me leje ndërtimore. Kërkesa e tij është për ndërtimin e një shtëpie në tokë private, ku pronar është Melit Bytyqi që është pronë private dhe tani mbetet tek ju vlerësimi dhe kërkoj prej juve pasi që drejtori i urbanizmit me kushtet ndërtimore, kështu që ju e vlerësoni dhe pastaj vendosni. Nëse ju vendosni për leje ndërtimore atëherë pronari do të filloj me ndërtimin e shtëpisë private në pronën e tij private.

Fehmi Hoxha – Faleminderit shume kryesues. Unë e pash këtu kërkesën e zotëriut në fjalë, që i është drejtuar drejtorisë se urbanizmit ku janë paraqitur edhe kushtet ndërtimore dhe shumë po befasohem ne këto kushtet ndërtimore në pikën 2 ku e ka nënshkruar një profesionalist shume i mirë Shpëtim Mustafa dhe drejtori, mirëpo ne pikën 2 është e mangët, ku lokacioni për të cilën është caktuar kushtet ndërtimore, ku sipas këtyre kushteve ndërtimore gjendet në kuadër të Planit Zhvillimor Komunal me numër 2566, të datës 13.05.2013 dhe kanë destinim të përhershëm. E para, kjo nuk është e përcaktuar, pasi është shumë me rëndësi të dihet në kuadër të Planit Zhvillimor Komunal parcela ne fjalë se çka është e dedikuar, se aty shkruan se për çka është, a është tokë bujqësore, kullosë, zonë ndërtimore, industriale apo çka. Në këtë rast po të ishte ndonjë investim strategjik që edhe në të kaluarën kemi pasur kërkesa të tilla për punësimin e njerëzve, e kemi fjalën për ndërrimin e destinimit e tokës bujqësore ne tokë ndërtimore për biznes që është Kosova Wine dhe me pas e kemi pasur edhe një kërkesë tjetër për Stone Castle ë është duke u ndërtuar hotel dhe me një arsyeshmëri të tillë është shume normale. Te gjitha objektet që janë të ndërtuara pa leje, ekziston në fuqi ligji për trajtimin e ndërtimeve pa leje për legalizim, kështu që të nderuar këtij dokumenti i mungon ortofoto e parcelës ne fjalë, a është shtëpi e ndërtuar apo jo. Unë nuk lejoj që ne si kuvendarë të bëjmë gabim dhe të marrim një vendim nëse shtëpia ka filluar të ndërtohet sepse është e kundërligjshme. Prandaj kërkoj nga propozuesi që të na argumentoj me ortofoto që është apo nuk është e ndërtuar shtëpia, pastaj që kjo pjesë çka është e paraparë me planin zhvillimor 2013 dhe njëkohësisht se çka është e paraparë me planin e ri zhvillimor komunal për të cilin

është bërë kërkesë për certifikimin paraprak në Ministrinë e Mjedisit dhe Planifikimit Hapësinor. Kështu që mos të ngutemi të bëjmë gabime se mundet edhe me na u kthye mbrapa. Nëse është e paraparë si ndërtim atëherë pse kërkohej ndërrimi i destinimit nëse është në kuadër të planit hapësinor për ndërtim nuk ka nevojë nëse është për ndërtim por nëse nuk është e paraparë për ndërtim atëherë ke të drejtë me shndërrua token bujqësore në tokë ndërtimore dhe nëse është e paraparë me Planin Zhvillimor Komunal për ndërtim nuk ka nevojë me angazhua ndërtuesin që me pagua taksa shtesë. Nëse është e paraparë atëherë mundet me ja lëshua kushtet ndërtimore menjëherë nëse është zona e ndërtimit, pra me ligj është e përcaktuar kështu.

Isak Hoti – Përsëritet për te gjithë. I nderuari Fehmi Hoxha ka të drejtë por vetëm për shkak të klasës. Ndërrim destinimi nga 1 deri 4 është obligative marrja e vendimit në kuvend pas marrjes së pëlqimit nga Ministria e Bujqësisë. Nga 5 dhe 6 është obligative me udhëzim administrativ ku thotë: ndërrimi i përhershëm i destinimit të tokës bujqësore nga klasa e 5 dhe 6 do të bëhet me vendim të kuvendit d.m.th. ne kemi obligim me marrë këtë vendim ndërsa nga 7 e tutje është vetëm në PZHK, ndërsa përveç PZHK-së nga 5 dhe 6 është obligim ligjor që me marrë që me marrë edhe një vendim kuvendi, për shkak se në listën poseduese shkruan se pavarësisht që me PZHK që e kemi paraparë që është për ndërtim edhe me PZHK –në e re por edhe me te vjetër është ndërtim ajo pjesë mirëpo është obligative sipas këtij udhëzimi administrativ që me marrë edhe një vendim në kuvend. Kështu që ligjërisht jemi në rregull pasi e kemi diskutuar pasi kemi shkua që edhe në PZHK a është e paraparë për ndërtim, kështu që veç me plotësua procedurën, jemi të detyruar me marrë edhe këtë vendim, pasi në certifikata është tokë bujqësore.

Fehmi Hoxha – Atëherë duhet të ndërrohet certifikata, nëse nuk është e harmonizuar me Planin Zhvillimor Komunal të vitit 2013. Mos të obligojmë ndërtuesin të paguaj taksa shtesë, se nëse është e paraparë për ndërtim duhet të ndërrohet certifikata dhe mos t'i merret para atij edhe nuk ka nevojë këtu me diskutua. Sinqerisht ju them se nëse është tokë ndërtimore në Planin Zhvillimor Komunal duhet të ndërrohet certifikata në Drejtorinë për Gjeodezi dhe Kadastrë.

Isak Hoti – Kërkesat e palëve kur vinë qoftë nëpër drejtori apo të njësisë, gjatë shqyrtimit hymë në rrjedha edhe e shohim se a është tokë bujqësore apo ndërtimore, sepse kjo varet edhe nga Agjensioni Kadastral dhe nuk është drejtpërdrejt nga ne dhe nuk mundemi me ndryshua asgjë. Kjo është vetëm një plotësim i procedurës, pasi kjo pronë është 1 euro m² dhe nuk me i pas afërsisht 500m², që realisht për komunën është edhe një e hyrë, pasi ligji e ka përcaktuar udhëzimi administrativ edhe pse unë kam kërkuar edhe në instancat me te larta që ky udhëzim administrativ me u ndryshua është i kohës së UNMIK-ut i vitit 2006 dhe ne endemi punojmë me këtë udhëzim dhe deri sa nuk është shfuqizua, duhet me patjetër me zbatua me përpikëri.

Kryesuesi – Faleminderit shumë z. Hoti për sqarimin, atëherë meqë nuk kemi tjerë të lajmëruar, e qesim në votim pikën e gjashtë të rendit të ditës. Konstatoj se me një votë kundër, aprovohet pika e gjashtë e rendit të ditës. Kalojmë në pikën e shtatë të rendit të ditës:

7. Shqyrtimi dhe aprovimi i Draft Rregullores për përkujdesje dhe Mbrojtje të Fëmijëve dhe marrja e vendimit për dalje në debat publik.

Mirsad Shala – I nderuar kryesues i kuvendit, Kryetar i Komunës, nënkryetar, drejtor të drejtorive dhe gjithë të pranishëm. Pas hyrjes në fuqi të ligjit për mbrojtjen e fëmijëve, me datën 17 korrik 2020, Komuna e Rahovecit në bashkëpunim me qendrën e trajnimeve dhe burimeve për avokim dhe në partneritet me organizatën Save the Children in Kosova dhe në bashkëpunim me komunat e Republikës së Kosovës ka hartuar draft rregulloren unike komunale për kujdesin dhe mbrojtjen e fëmijës. Qëllimi i hartimit të kësaj rregullore është mbrojtja e fëmijës nga të gjitha format e dhunës fizike dhe mendore abuzimit ndëshkimit trupor keqtrajtimit neglizhimit apo ndonjë formë tjetër që vë në rrezik jetën sigurinë shëndetin edukimin arsimimin dhe zhvillimin e fëmijës. Për caktimin e detyrave dhe përgjegjësinë e subjekteve për mbrojtjen e fëmijës si dhe mënyrën e koordinimit raportimit dhe bashkëpunimit të tyre me qëllim të kontributit në sistemin për mbrojtjen e fëmijëve dhe kontributin në krijimin e një komune mike për fëmijë. Andaj pas diskutimit nga

ana e juaj, kërkoj nga ju që të merret vendimi për dalje ne debat publik të rregullores për përkujdesje dhe mbrojtjen e fëmijës ne komunën e Rahovecit.

Kryesuesi – Faleminderit z. Shala, të nderuar kolegë kuvendarë e kemi diskutuar edhe në Komitetin për Politikë dhe Financa, e cila është një rregullore që do të jetë unike për të gjitha komunat njëjtë, që janë pjesë e punës që është marr Save the Children dhe ARTC-ja.

Fahrie Lushi – Edhe ne KPF e kemi diskutuar sikur të gjitha pikat edhe këtë pikë, mirëpo thjesht e kam thënë edhe në Komitetin për Politikë dhe Financa se si rregullore është e hartuar në përputhshmëri të çdo dispozite ligjore që u përkon me fëmijët dhe të drejtat e tyre. Mirëpo kur jemi te neni 12 dhe 13 të cilat vlen të përmenden sepse kanë të bëjnë me përkujdesjen e fëmijëve po ashtu sjellja në shkollë dhe çdo institucioni tjetër, duke filluar nga familja dhe unë do e ndërlihdë këtu me dy raste të vitit të kaluar, që kanë të bëjnë me abuzimin e një vaje të re në një objekt shume afër shkollës po ashtu edhe me ata fëmijë që keqtrajtohen nga mësimmhënësit në shkolla e sidomos është përmendur Shkolla e Mesme e Lartë në Ratkoc.

Kryesuesi – Faleminderit zonja Lushi, atëherë meqë nuk kemi tjerë të lajmëruar, e qesim në votim pikën e shtatë të rendit të ditës. Konstatoj se unanimisht aprovohet pika e shtatë e rendit të ditës. Kalojmë në pikën e tetë të rendit të ditës:

8. Shqyrtimi i Propozim vendimit për shfuqizimin e vendimit 01 Nr.124/20 të datës 29.10.2020, për dhënien në shfrytëzim afatgjatë.

Isak Hoti – Fatkeqësisht jemi të obliguar me shfuqizua këtë vendim edhe pse e kam cekur edhe në Komitetin për Politikë dhe Financa që janë marr dy vendime të dyfishta që për të njëjtën çështje ne e kemi zhvilluar një procedurë me herët në fshatin Radoste edhe konfirmimi i ligjshmërisë na është kthyer pozitiv dhe për të njëjtën çështje ne fshatin Gexhë ky vendim është kthyer negativ. Kemi pasur disa debate me MAPL-në rreth kësaj çështje mirëpo nuk kemi mundur me kthye këtë vendim. Kështu që jemi detyruar me ndërrua strategji, ku ky vendim te pika 9, nuk ka nevojë me shkue në MAPL, që është përcaktim të lokacionit dhe ne atë vendim kemi thënë që objekti si objekt por edhe prona nuk ka me ndërrua destinimin por objekti ka me mbet pavarësisht se cili donator mundet me ndreq dhe objekti ka me mbet pronë e komunës dhe nen mbikëqyrjen e komunës. Për ndryshe forma tjera për dhënien në shfrytëzim për këto dhe që kemi pasur edhe raste tjera përpos të caktimit të lokacionit për ndërtimin e këtyre objekteve për nevojat e fshatrave.

Kryesuesi – Faleminderit z. Hoti, atëherë të nderuar kolegë meqë jemi të detyruar ta shfuqizojmë se pari vendimin, e qesim ne votim pikën e tetë të rendit të ditës. Konstatoj se unanimisht aprovohet pika e tetë e rendit të ditës. Kalojmë në pikën e nëntë të rendit të ditës:

9. Shqyrtimi i Propozim vendimit për caktimin e lokacionit për ndërtimin e objektit për nevojat e komunitetit të fshatit Gexhë.

Kryesuesi – E dhe me herët sqarimin z. Hoti, se duhet të bëhet vetëm kjo pjesa e plotësimit si caktim i lokacionit. Atëherë nëse nuk ka dikush diçka rreth pikës se nëntë, e qesim ne votim pikën e nëntë të rendit të ditës. Konstatoj se unanimisht aprovohet pika e nëntë e rendit të ditës. Kalojmë në pikën e dhjetë të rendit të ditës:

10. Shqyrtimi dhe aprovimi i Propozim vendimit për dhënien në shfrytëzim afatshkurtër.

Isak Hoti – Fjala është për objektet e Palestrës që kanë me u dhënë në shfrytëzim dhe me hyrjen ne fuqi të rregullores se re në shfrytëzim dhe këmbim të pronës së paluajtshme komunale është obligative që secili objekt dhe secili lokal duhet me pas numrin dhe certifikatën e vet të pronës dhe si rezultat i kësaj na kanë kthyer negativ me plotësua edhe me ndryshua. Kështu që ne i kemi bo të gatshme edhe me siguri sekretaria e kuvendit ju ka dorëzuar juve planin e Palestrës bashkë me aktvendimin që e ka nxjerr Drejtoria për Gjeodezi, Kadastër dhe Pronë, ku gjithsej janë 11 prona që janë të përcaktuara me metër katror dhe secili lokal e ka marr numrin në certifikatën e vet. Kështu që ne do të bëjmë gati menjëherë pas kësaj seance sepse nuk kemi pasur

mundësi që të kenë gati për këtë seancë edhe kur shkon vendimi ne MAPL atëherë do të shkon të bashkangjitura bashke me certifikatat e pronësisë, kështu që edhe ne këtë pikë jemi në rregull.

Fehmi Hoxha – Ne e kemi sjellë një vendim edhe nuk duhet ta shfuqizojmë atë vendim prej seancës se kaluar që me marr këtë vendim tjetër.

Isak Hoti - Në fakt është ndryshimi dhe plotësimi i vendimit pasi është gabim i titulluar si pikë edhe ashtu ka ardh te ju, përndryshe është ndryshimi dhe plotësimi i vendimit dhe nuk është vendim i ri.

Kryesuesi – Faleminderit z. Hoxha, atëherë më qe nuk kemi tjerë të lajmëruar, e qesim në votim pikën e dhjetë të rendit të ditës: **Ndryshimi dhe plotësimi i propozim vendimit për dhënien në shfrytëzim afatshkurtër.** Konstatoj se unanimisht aprovohet pika e dhjetë e rendit të ditës. Kalojmë në pikën e njëmbëdhjetë të rendit të ditës:

11. Informatë për zonën e mbrojtur "Kanioni i Drinit të Bardhë te Ura e Fshejtë".

Rumir Zhuniqi – I nderuar kryesues, i nderuar kryetar, kuvendarë dhe gjithë ju të pranishëm. E paraqes një informatë për Kanionin e Drinit të Bardhë te Ura e Fshejtë e cila është monument natyre me karakter hidrogeomorfologjik për shkak të këtyre karakteristikave natyrore, ky monument prej vitit 1986 është shpallur Zonë e Mbrojtur. Meqenëse kjo zonë ndodhet në kufirin administrativ ndërmjet komunës së Gjakovës dhe komunës së Rahovecit, të dy komunat janë dokorduar që këtë hapësirë pra këtë zonë të mbrojtur që ta shpallin monument natyre si zonë e mbrojtur. Sipërfaqja e përgjithshme në territorin e komunës së Rahovecit është 125 hektar ku me pronësi shoqërore është 84 hektar ndërsa pronësi private është 40 hektar. Zona ndahet në zonën e ngushtë apo rigoroze dhe zona e gjërë apo mbrojtëse. Me datën 10.05.2016 është formuar grupi punues për hartimin e arsyeshmerisë profesionale për trajtimin e Kanionit të Drinit të Bardhë apo rikategorizimit të kësaj zone. Në këtë komision apo grup punues kanë marr pjesë anëtarë të institutit për mbrojtjen e natyrës e po ashtu edhe nga komuna e Rahovecit me ish-drejtorin Fehmi Hoxha dhe nga komuna e Gjakovës si bashkëpunëtorë profesional për çështje mjedisore Fatos DEDA. Në raportin përfundimtar të arsyeshmerisë profesionale vetëm anëtari nga komuna e Gjakovës nuk e ka nënshkruar. Grupi punues ka propozuar me kufijtë e ri fillimisht për komunën e Rahovecit dhe me krijimin e rrethanave të përshtatshme edhe për atë të Gjakovës të mbetet ne kategorinë e monumentit të natyrës mirëpo në propozim është dhënë arsyeja apo është propozuar që zona të zvogëlohet pra zona e mbrojtur. Pjesa e cila është propozuar që të hiqet është pjesa nën rrugën kryesore që të dërgon në Gjakovë.

Kryetari – Në fillim u shtrua çështja se pse është informatë edhe pse nuk ka një përpjekje me cilësue rendin e ditës dhe me dërgua ne funksion të vendimmarrjes nga ana e Kuvendit. Unë besoj që e keni parasysh se ne nuk mundemi me veprue ne drejtim të vendimmarrjes pa pasur një informatë të qartë dhe të sakte se çka është zona e mbrojtur se çka nënkupton zona e mbrojtur sa është zona e mbrojtur pastaj çka duhet mbrojtur dhe çka është zonë e ngushtë dhe çka është zonë e gjërë dhe pa pasur edhe një dakordim edhe nga komuna e Gjakovës sepse ju e dini se vetëm lumi e ndan zonën apo kanionin dhe ne duhet të përgatitemi nëse kërkohet vendimmarrje. Dhe tash për tash nuk ka pasur as mundësi por as nuk kemi të drejtë me i dhanë vetes një detyrë për një çështje kaq strategjike edhe përkundër faktit se ne jemi të vetëdijshëm se ka edhe përpjekje për ngushtim të zonës, se ka edhe ndërtime edhe të paligjshme e pa leje, po ashtu ka edhe përpjekje për me përvetësue pronën publike dhe pronën komunale dhe deri me tani kemi mbërrirë me i ndaluar plotë veprimtari të cilat ndoshta kishin pas dëshirë ata me i zhvillua. Unë mendoj që në të ardhmen, ne duhet të përgatitemi me informacione edhe më të shumta se si duhet të kategorizohet zona e mbrojtur dhe jo si të ngushtohet zona e mbrojtur, që sipas komisionit veç po dihet që janë kategoria rigoroze apo e ngushtë që është e paprekshme dhe kategoria me e gjërë që përfshin një sfond më të gjërë me sipërfaqe, edhe kjo duhet të studiohet dhe të hulumtohet dhe besoj që tani për tani ne nuk duhet të ngutemi dhe pajtohem me Fehmi Hoxhën që tha se ne nuk duhet me lejua me gabua pa e ditur se ku jemi. Unë e di që dikush ka përmendur se ka kritere por nëse bëhet fjalë për kategorizim të zonës duhet të shkojmë me tutje në studim në hulumtim në argumentim dhe faktim dhe nëse bëhet fjalë për

ngushtim të zonës duhet të kemi parasysh se është situatë e rrezikshme ngushtimi i zonës se mbrojtur nuk është mirë me ndodhë se paku apo me marr vendime ne si komunë pa i pae edhe disa parametra tjerë siç është komuna e Gjakovës pastaj me pae gjendjen faktike në terren dhe pastaj me vendos edhe kriteret specifika e plote gjëra tjera, në mënyrë që Kuvendi i Komunës me qenë me i aftësuar dhe me i përgatitur për me marr një vendim duke pasur para vetes edhe një busullë të qartë edhe në përputhje me ligjin edhe në përputhje me synimet që ka komuna jonë. Për më tepër e kemi edhe komunën e Gjakovës që përsëri duhet me pas një linjë komunikimi dhe të bashkëpunimit me ata sepse nuk mund të ndodhin veprime të tjera në pjesën ku është e Rahovecit dhe veprime tjera në pjesën ku është e Gjakovës sepse me ligj kjo është një zonë e cila duhet të mbrohet dhe mund të kategorizohet zona por duhet të kemi kujdes kur bëhet fjalë për ngushtimin e zonës se mbrojtur. Unë e di që kjo informatë na ka bo me syhapur sepse kam kërkuar prej drejtorit të Urbanizmit në përputhje me kërkesën që ka pasur grupi i PDK-së qoftë i Fehmiut apo i Rasimit apo si grup dhe po ashtu edhe ne emër të komunës është bërë përpjekje edhe me herët dhe ne tash kemi fillua me hy në thelbin e një informacioni i cili ka nevojë akoma më shumë me u qartësua me u argumentua me u faktua në mënyrë që në një nga seancat e ardhshme me qenë më të gatshme për diskutime të cilat ndoshta mund të qojnë nga ndonjë vendimmarrje me e drejtë edhe e ligjshme e kuvendit të Komunës së Rahovecit. Pra nëse dikush e ka keqkuptua në fillim, unë po ju sigurojë që kjo është arsyeja edhe asnjë arsye tjetër nuk ekziston pse rendi i ditës nuk është bërë kategorizimi apo ri kategorizimi i zonës por është bërë një informatë, që ta kenë të qartë anëtarët e Kuvendit dhe qytetaret e Komunës së Rahovecit se ne nuk kemi shumë zona të mbrojtura dhe po ju siguroj që e kemi një zonë të mbrojtur te Manastiri i Zoqishtit apo te Hoça e Madhe dhe ta dini se nëse ne duam të mbrojmë zona të mbrojtura atëherë pa hy neper disa filtra nuk mund të bëhet asgjë në ato zona edhe ne meqenëse e kemi Kanionin e Urës së Fshejtë të kujdesemi edhe pak më shumë për informacione që të jemi edhe me të qartë në mënyrë që të jemi me kompetent diskutime edhe ne vendimmarrje në të ardhmen, ndoshta në janar do të ketë diçka më shumë, tani nuk po dua me paragjyke por sidoqoftë informata besoj që është e vlefshme pasi kemi edhe informacion shtesë që kemi grumbullue edhe kemi kërkuar edhe prej komunës së Gjakovës e po ashtu kemi marr edhe krejt punën që ka bo asamblisti Fehmi Hoxha edhe normalisht jemi në përpjekje që gjatë procesit të marrim edhe informacione tjera të vlefshme si fakte dëshmi që ta qartësojmë synimin se çka dëshirojmë me bo rreth kësaj zone. Unë mendoj se hapësirë për debat ka gjithmonë por me qellim e mora fjalën që mos me pas asnjë lloj keqkuptimi.

Rasim Fazliu – Faleminderit kryesues, unë pajtohem me kryetarin 100% për të gjitha fjalët që i tha, por dua me sqarua pse e kemi ngritë këtë çështje si pikë të rendit të ditës, pasi arsyeja është se ky material ka qenë i përgatitur qysh ne vitin 2015, por, ne e kemi pasur në diskutim këtu në dy mbledhje por për shkak se ka qenë vit zgjedhor e kemi shtyrë pasi kemi konsiderua se mundet me u bo politikë, pra kjo ka qenë arsyeja. Edhe çështja që e kam ngritë duke mendua se ky është material i gatshëm edhe ne mund ta diskutojmë edhe të marrim vendime, përndryshe atëherë kur e kemi pasur ne vitin 2017 por edhe sot, unë personalisht e ndaj mendimin e njëjtë edhe tani se nuk jam për ngushtimin e zonave apo zonës se mbrojtur në këtë rast absolutisht, dhe ne duhet të insistojmë edhe si kuvend edhe në çfarëdo forme tjetër që me insistua që zonën e mbrojtur me ruajt, edhe më vjen shumë keq që ndër vite e deri me sot që qeveritë përkatëse që kanë qenë, që kanë lejuar me u ndërtua aty pa leje që është një papërgjegjshmëri atyre qeverive. Përveç kësaj jam për atë që mos me u ngutë që me pas mundësi me shqyrtua mirë edhe me punua mirë në këtë drejtim edhe me bo materialin e gatshëm edhe me mbrojtë tamam ashtu siç është zonë e mbrojtur. Po kërkoj që për mbledhjen e radhës, të na servohet prej drejtorisë përkatëse lista e gjithë atyre njerëzve qoftë që kanë ndërtua apo që kanë uzurpua, dua të bëhet publike këtu dhe nuk dëshiroj që ne si kuvend me marr vendime symbyllas dhe dëshirojmë me ditë në çdo detaj pasi jemi përfaqësues të komunës së Rahovecit pasi jemi të zgjedhur me votën e tyre.

Fehmi Hoxha – Me qellim dola këtu pasi ne mandatin kur unë isha drejtor i Drejtorisë së Urbanizmit dhe Planifikimit Hapësinor atëherë është iniciuar kjo procedurë, që do të thotë së është si informatë që edhe unë pajtohem së mirë që e keni bërë si informatë, mirëpo kjo është vendimmarrje e re dhe pak nga këta kanë qenë atëherë edhe mirë do të ishte me pas një informatë pak me të thuktë pasi është një çështje mjaft delikate mirëpo unë do të mundohem me pika të shkurta të ju informoj rreth procedurave që janë zhvilluar. Me vendim të Kuvendit Komunal është marr iniciativa për rikategorizimin e zonave të mbrojtura. Përgjegjës për kategorizim dhe rikategorizim në baze të ligjit mbi planifikimin hapësinor është Instituti për Mbrojtjen e Monumenteve Natyrore, atëherë që ka funksionuar pranë Ministrisë së Mjedisit dhe Planifikimit Hapësinor. Është marr vendim pastaj është bërë debat publik me qytetaret, kemi shkuar së bashku me ish kryesuesin e Kuvendit dhe kuvendarë të tjerë, kemi shkuar edhe ne lokalitete si në Gexhë dhe Xerxë ku kemi marr propozimet dhe kërkesat nga individë qytetarë dhe para se marr vendim për hapjen e shqyrtimit publik, te gjitha ato kërkesa janë shqyrtuar këtu në kuvend dhe është marr vendimi për shqyrtim publik që ka pasur 30 ditë afat, ku brenda afatit përsëri janë shqyrtuar të gjitha kërkesat ku grupi punues që ishte i formuar atëherë me vendim të sekretarit të Ministrisë së Mjedisit i ka shqyrtuar të gjitha dhe ka ardhë në përfundim dhe faktikisht ja ka dhënë Kuvendit Komunal propozimin profesional për ri kategorizimin e zonës së mbrojtur, ku 18 muaj është punuar ku të gjitha ekipet profesionale edhe të botanikës edhe të historisë arkeologjisë kanë qenë të kyçura ne ekipet tjera, prandaj edhe e ceku shefi i grupit tonë të PDK-së që është tërhequr për shkak të zgjedhjeve që mos të politizohet. Ne vitin 1986 është shpallur zonë e mbrojtur nga ana e ish Kuvendit Komunal në kohën e ish-Jugosllavisë ndërmjet komunës së Rahovecit dhe Gjakovës, ku në bazë të ligjeve të atëhershme kanë pasur mundësi të dy komunat ta shpallin një zonë ndërsa tani ligji për vetëqeverisje lokale ka ndryshuar dhe planifikimin hapësinor për komunën e Rahovecit e bën propozuesi pra ekzekutivi dhe vendos kuvendi edhe për komunën e Gjakovës dhe për këtë arsye nëse keni marrë materialin që edhe drejtori e ka komplet materialin që besoj që ja keni përcjell edhe kryetarit, aty është marrë vendim nga ministria dhe instituti që njëherë të shkon nga Rahoveci pastaj ne momentin që krijohen kushtet del edhe ne Gjakovë. Por, e rëndësishme është se vendimi i vitit 1986 duhet të ndryshohet preambula, a po doni me lan ashtu si është, me ngushtua apo me zgjerua, krejt kjo varet prej diskutimeve si do të rrjedhin, prej propozimit të ekzekutivit edhe vendimmarrja është e kuvendit. Pra, preambula duhet të ndryshohet dhe te harmonizohet me ligjet aktuale të Republikës së Kosovës dhe për këtë kam kërkuar që të hyjë në diskutim publik. Pra, është mirë të diskutohet dhe të analizohet mirëpo kërkojmë që propozimin profesional të Institutit për Mbrojtjen e Monumenteve Natyrore që janë përgjegjës për kategorizim dhe hartimin e propozimit profesional nuk vendosin ata por pikërisht është ky kuvend dhe sigurisht që ne do ta diskutojmë se si do të bëhet, që a do të zgjerohet apo ngushtohet mirëpo propozimi profesional për shkak të informatës më të mirë dhe më thuktë që do e këtë secili kuvendarë t'i dorëzohet secilit një kopje dhe me pas do ta analizojmë dhe do të ishte mirë që për hir të Planit Zhvillimor Komunal pra planit të ri të cilin e kemi që është bërë kërkesa në ministrinë përkatëse për marrjen e certifikimit paraprak, pasi është peng kjo zonë dhe duhet të rregullohet pasi kurrë s'po e ndryshojmë veçse po e ndërrojmë preambulën nëse ju jeni të pajtimit mirëpo duhet të rregullohet për me ecë tutje edhe Plani Zhvillimor Komunal dhe pas Planit Zhvillimor Komunal është harta zonale që është proces që janë të lidhura. Pra po kërkoj që secilit kuvendarë që ti shpërndahet nga një propozim profesional i institutit për mbrojtjen e monumenteve natyrore dhe do të vendosim përsëri dhe do ta bëjmë bashkë dhe jo të ngutemi që të bëjmë diçka jo mirë.

Kryetari – Unë pajtohem me Rasimin se duhet t'i sjellët kuvendit lista e operatorëve qofshin subjekte fizike apo juridike që operojnë në zonën e mbrojtur dhe të dihet saktësisht se kush janë dhe kush ka ndërhy në zonën e mbrojtur edhe pajtohem plotësisht me këtë edhe besoj që drejtorja e Urbanizmit do ta sjellë këtë listë në seancën e ardhshme. Pastaj ne jemi në proces të përmbylljes të asaj që quhet Plani i ri Zhvillimor Komunal

dhe me pastaj e kemi të ndërlidhur Hartën Zonale. Në Hartën Zonale sigurisht se mund të precizohet shumëçka, në planin zhvillimor në vija të trasha mund të vendosen parime por në Hartën Zonale përcaktohet dhe definohet pothuajse gjithçka. Unë po besoj që kemi kohë të mjaftueshme me u shërbye edhe me vlerësimet që i ka bërë instituti për mbrojtjen e monumenteve të natyrës por mos të harrojmë se duhet me i pa në proces se çka ka ndodhur me PZHK-në dhe çka do të ndodhë me pastaj me Hartën Zonale, që sigurisht që të gjitha kanë me u diskutue në këtë Kuvend të Komunës. Po ashtu duhet me pas parasysh se ne nuk mundemi në një hapësirë ku është kanioni i Urës së Fshejtë pra Drini i Bardhë nuk mund të operojmë pa u koordinua edhe me komunën e Gjakovës. Pra, nuk është se unë jam për me mbet peng në fuqi ligjet dhe preambulat e krahinës autonome të Kosovës pasi tash jemi shtet, mirëpo nuk mundemi me bo asgjë edhe pa komunën e Gjakovës, kështu që duhet me rritë fokusin edhe ekspertizën edhe të komunës se Gjakovës bashkë me ekspertizën e komunës së Rahovecit pasi ka një kanion aty që e ndan komunën e Rahovecit me atë të Gjakovës si kufinj administrativ dhe është monument i mbrojtur pavarësisht vendimeve dhe vendimet duhet me qenë në përputhje me ligjet për zonat e mbrojtura dhe monumenteve të natyrës. Unë mendoj se kemi kohë me bisedua edhe pajtohem edhe me atë që kërkoj Fehmia që t'i jepet edhe vlerësimi i institutit, pasi tash mund të ketë zhvillime te reja dhe me i dhanë mundësi që pjesa e kuvendarëve që janë më të rinj edhe që janë ndoshta për herë të parë në këtë kuvend me pas informata më të qarta edhe duhet me u shërbye edhe me shume informacione pasi kjo është pjesë e nisur kaheerë dhe në momentin kur kemi argumente fakte dhe plot dëshmi atëherë besoj që vendimarrja është më e lehtë. Kështu që nuk po them që duhet me vonua këtë çështje pasi drejtorja e urbanizmit nëse kërkon ndihmën e ndonjë komisioni të Kuvendit atëherë secili grup parlamentar mund ta caktoj në njërin prej anëtarëve të grupit për krijimin e këtij komisioni, jo vetëm në funksion të përshpejtimit por edhe te sigurimit të një informacioni me te plotë për krejt ato çka kanë ndodhur dhe çka është dashtë me ndodhë ne te ardhmen. Unë e kam edhe si propozim që nëse mundeni me nxjerr një komision prej kuvendit që me u marr me këtë punë në ndihmë të drejtorisë se Urbanizmit do të ishte ne funksion të ndihmës rreth kësaj çështje.

Fehmi Hoxha – Rreth kanionit është ligji i ujërave që e përcakton qartë, 150 metra afër lumit nuk guxon me u ndërmarr asnjë veprim, pasi është e ndaluar me ligjin e ujërave.

Kryesuesi – Faleminderit z. Hoxha, kalojmë ne pikën e parë shtesë: **Plani i Punës vjetore të Kuvendit për vitin 2021, për dalje në debat publik.**

E qesim në votim. Konstatoj se unanimisht aprovet pika e parë shtesë. Kalojmë në pikën e dytë shtesë: **Plani i punës vjetore për vitin 2021 i Kryetarit të Komunës për dalje në debat publik.**

E qesim në votim. Konstatoj se unanimisht aprovet edhe pika e dytë shtesë.

Me propozimin e anëtarit të kuvendit z. Vahid Krasniqi që të jetë edhe një pikë tjetër : **Lista rezervë për emërtimin e rrugëve.**

Vahid Krasniqi – Sipas sqarimit të kolegut Munib Durgutit, kjo po i bie që skemi nevojë me e qitë sepse na ndalon ligji për me dal jashtë asaj ligji, kështu që ata emra që vijnë si të rinj mundemi me i futë në atë listë si plotësuese, bazohem nga ajo që tha z. Durguti nëse vërtet është i sigurt mirëpo nëse nuk është i sigurt atëherë të fusim ne votim edhe ta bëjmë si listë rekomanduese e jo listë obligative, pasi sipas vendimit të fundit është listë obligative.

Munib Durguti – Faleminderit kryesues, unë ndoshta pak e kam keqkuptua që nëse komisioni aktual për emërtime lidhet ekskluzivisht me listën e rezervë që është formuar prej komisionit paraprak atëherë këtu kemi mospajtime sepse nuk kam parë që duhet me qenë e që thotë duhet gjithmonë ajo liste te përdoret. Por drejtorja për urbanizëm apo zyrtari për urbanizëm çdo herë hulumton në teren dhe plotëson listën e rezerve dhe i sjellë kuvendit për aprovim. Atëherë nëse kemi një liste që ka aprovue drejtorja përkatëse edhe dëshiron me i lexua emrat që kanë ardhë prej lagjeve të qytetit, fshatrave apo këshillave atëherë le të propozojnë edhe e

lexojmë një nga një edhe e aprovojmë listën e rezervë pasi kuvendi është ai që e aprovon, pasi aty thotë me ligjin administrativ se Kuvendi është ai që e aprovon, mirëpo nëse nuk kemi emra të gatshëm atëherë e shtymë për seancën tjetër.

Kryetari – Kuvendi i Komunës ka vendos që komisioni kur e ka sjellë listën rezervë pas shqyrtimit të ankesave ka obligim në emërtime të reja me respektua listën e rezerve, unë kështu e kam kuptuar Vahidin edhe kështu besoj që është. Pra, asambleisti Vahid Krasniqi po thotë që a mundet kuvendi i Komunës që me heq karakterin obligativ pra opsionin obliguese listës rezerve që me pastaj me mbet listë rekomanduese me plotësime të reja që bëhen nga komisioni i ri për emërtime. Pra Vahidi po thotë që kuvendi ka për obligim me zbatue listën e rezerve, kështu që nuk është patjetër i obliguar me ja vënë emrin një rruge me emrin e listës rezervë, do të ishte mirë me përfill listën rezervë por jo me qenë obligative.

Vahid Krasniqi – Ashtu siç tha Munibi me herët, ne si komision ende jemi pa e përfundua punën dhe neve vazhdimisht po na vinë kërkesa prej bashkësive lokale dhe fshatrave. Unë kërkoj dhe kish me qenë me mirë që këtë listë ta fusim si rekomanduese dhe të kemi mundësi që ta votojmë pasi nuk po i heqim dhe ne i kemi përdor afërsisht 20% emra e kësaj liste por nuk mundemi me i përdor krejt pasi kërkesat tani që janë bërë janë me nënshkrime si lagje bashkësi lokale apo kryetar i fshatit. Kështu që ta fusim si listë rekomanduese edhe po besoj që është më mirë edhe me e lehtë edhe për komisionin por edhe për kuvendin ne fund me vendos.

Kryesuesi – Të nderuar kolegë, a keni të qartë lidhur me kërkesën dhe propozimin e z. Vahid Krasniqi.

Rasim Fazliu - Ne edhe për emërtimin e rrugëve është ligji dhe ne qysh atëherë e kemi punuar ne baze të ligjit, por ajo që po dua të them është që nuk jemi kundër asaj që me largua fjalën obligative edhe me vendos rekomanduese, mirëpo edhe nuk jam për atë që grupe të caktuara të njerëzve po veprojnë në terren dhe po manipulojnë edhe ndonjëherë po i marrin edhe me forcë, që më pastaj po vjen deri te keqkuptimi edhe po krijohet mos pajtueshmëri. Kështu që jam për atë që komisioni me qenë shumë i vëmendshëm sepse ne jemi Kuvend Komunal dhe jemi për me i ofrua njerëzit e jo me i përçarë njerëzit kështu që me qenë shumë të vëmendshëm në këtë drejtim dhe gjithashtu jam për atë që me i emërtua me emra nga njerëzit me meritore që janë edhe që e dëshiron vet ai lokalitet por gjithsesi edhe kuvendi është mirë me u informua me ato emra dhe sigurisht në fund ato propozime në fund kanë me ardh edhe ne kuvend për miratim por ndoshta nuk do të ishte keq që në këtë mbledhje, anëtarët e kuvendit me na prezantua me atë listë të emrave, në mënyrë që mos të marrim vendime pa u koordinuar pasi arsyeshmëria është e mirë dhe e saktë pasi nuk është e drejtë me than si diçka obligative pasi asgjë nuk është obligative, po besoj që isha i qartë rreth kësaj çështje. Por mos të lejohet që të bëhen manipulime pasi jam për sinjeritet dhe meritokraci.

Kryesuesi- Faleminderit z. Fazliu, besoj që u sqaruam rreth kësaj çështje që po kërkohet pra fjala obligative të zëvendësohet me fjalën rekomandim. Atëherë e qesim ne votim. Konstatohet se unanimisht aprovohet pika shtesë e rendit të ditës. Të nderuar kolegë kuvendarë, kryetar, drejtor të drejtorive, ju falënderoj shumë për kontributin e dhënë dhe mirupafshim në mbledhjen e radhës.

Mbledhja përfundoj 12:30

01-Nr.145/20

Datë: 29.12.2020

Procesmbajtësi:


Agim Hoti

